

28

A. & R.

Albin Currat
F. Grandv.

La Pêra d'intsapyo

=====

On gotrà ke ch'in rèvinyê dè franthe yô
li avi fê on voyâdzo dè cha dzoua, mè
rakontâvè ke l'avê vijitâ tan dè mothi,
dè monachtéro è dè tsathi, intrè mi dè
vayin goutâ è marindè kemin lè chan fére
léva-lé, ke mè démandâvo che li irè jou
cha dzoua ou bin chat'an.

Pachke mè, l'ôtro dzoua, m'amêno vê kôkon
ke chàbrè din ouna bala méjon, è in arevin
chu le pâyèmin dè lâpiè gryè, i rémârko
a man gôtse dè la pouârta d'intrâye,
déjo la loyèta tsardjia dè bon po lè forni,
ouna bala pêra d'intsapyo, d'on bi gri
ardzin dè la carière de l'Evi prou chur,
i fathè bin tayè, dè trè pi dè grantchyà,
d'on pi dè lârdzo è gayâ dou pi dè hô,
pechiâ hinkantè cha santimètre puchke lè
ban dè rotse de l'Evi, fajan chin d'épè-
chià, l'è po chin ke lè no dè l'Intyamon
chon djémé tan prévon.

Kan i tayivan hou no, din lè pye bi mochi
dè tsejête, i fajan di pithè po di méjon,

di kou, i lèvâvan hou tan balè crê ke
 lè j'anhian pyantâvan to gran di tsemin
 de la kemouna, dâtâyè dè l'an de la
 michyon, ke di Kapuchin iran vinyê pridji
 din la pérotse, è ke i Rogachyon la krê
 de fê travayi ke churmontâvè chon cho dè
 pêra irè tota botchatâye pè lè dzounè
 fiyè dou velâdzo, è lè dzin dêri lou kuré,
 in prochèchyon, tsantâvan lè grâthè dè
 Noutha-Dona è dè ti lè chin ke hou trè
 dzoua, on réchayechê dè lou Chinte Ombre
 po prononthei lou non è lou fére rindre lou
 bènèfitho chu ha kotse dè têra, in pachin,
 kan le tsemin irè tru krouyo, que lou fayi
 fouriâ lè goyè, chtiche ou l'ôtro ke l'avê
 di mochi a fênâ din l'indrê, vouitivè le
 chindike on bokon fèrmo in brinin la titha
 po bin li mothrâ k'on yâdzo dè gravié cheri
 le bin vinyê.

E pu, djuchtamin ha pêra inke, ou bè opojâ
 ou mû de la méjon, li è pyantâ, l'inthyeno
 pya a titha karâye, dè dou pâdzo dè koté
 din on pertè fê achurâ pa on Valdotin, dè
 hou ke vinyan din le tin loyi lou charvucho
 din lè mithi de la pêra è di brekè, kemin
 prà dè chè kamerâdo, chti l'inthyeno, tinyê

pa katro koin dè temi po l'impatchi dè lotâ.
 A on mètre dévan, ou déchu, pindu a ouna
 kemoulèta, pyantâye din la tralèjon dè la
 loyèta, ouna kouârda avoui on pombyà ou
 bè, to chin po mantinyi le fouthi a bouna
 hôtchià kan l'omo intsapiè dè chon martalè
 a prin bè, pâ kemin lè kouètso è lè Vôdoi
 ke tapon lè fô a bothyon, chu ou n'inthyeno
 rion avoui on martalè pya ; vêr no k'on a
 le rèchpè di badjè, rin dè chin.

Ou n'anthyan fermo chuti po adjuchtâ lè
 fô m'a aprê oumintè hinkanta kou ; léchi
 l'èchpâcha d'ouna pithe d'on chou intrè mi
 dè l'inthyeno è dou fi de la fô, tapâ
 galéjamin in rèpouchin la matêre in kontre
 le talon, ma achyin, pâ la détindre, le
 fê di dèkréji dè trè dê dou fouthi ; è on
 mache dè rekemandachyon ke no vinyon du
 le fon di j'âdzo, kan grâthe ou fê, l'omo,
 dè tsathià, lè vinyê kultivateu, in rétsêrtsin
 chon mèyà. Mè fô vo dre ke ou Granvelà, on
 fermo bon chèyâre, l'a non chêta, titro
 suprême.

N'in d'iro inke dè mon chondzo, kan m'intindo
 tchirâ du le fon dou pouêrtso ; vin dedin,
 t'é dza vachâ la gota, è pu tchè admirâvè-
 he inke dévan ? " n'é pâ oujâ li dre "

è bin, ouna bala batéri dinche, tan dè
 chenayè, dè routsè, dè hyâre, dè chamouni
 è tan dè gelin, bin adjuchtâ a lou granta
 pêrtse, d'on bè a l'ôtro dou bougo in
 anthe dè panê ou déchu de la chê dè palin
 chantournâ de la louye tota botchatâye dè
 géranion è ôtrotêri, i vayê la pêna de
 m'arèthâ po vouiti ou bin ?

L'ôtro rachurâ dè mon " bon go " po chè
 hyotsètè è cha fèna po chè botchè, iran
 ti dou fermo kontin.

Ou Granvelâ din le tin, totè lè méjon
 l'avan lou pêra d'intsapyo, tchè le mothi
 bin chur, ma la cura vouê, puchke l'inkourâ
 tinyê kemin to le mondo on piti trin dè
 kampanye, ouna banye farâye di katro pi li
 chervechê d'apyê, la betâvè chu lè kemon
 le tsôtin, irè to pri dou velâdzo, alâvè
 bin, on lè poui rèprindre à la détsoumâye
 po lè j'apyiéyi i tsèrâyè dè fin ou dè
 rèkouâ ; on kou vithiyiè dè bori è dè cro-
 pêrè, menâyè ou tsèvètho, lè totè brâvè i
 lachè, fajan l'afére d'on tsavô po hou ke pyan
 pâ n'in d'adzetâ on, n'in d'avê ke vouar-
 dâvan on tsâtho ou bin on tsévèko ; avouê
 i pyian tsèrèyi l'evê, a la yudze à biyon,
 achebin l'è j'apyièyi ou grô tsê po menâ

i réchè dè Bulò lè tsejon ou bin avoui le
 kouvè menâ le bou a papê chu lè vagon dè
 tsemin dè fê in gâre dè Bulò achebin.
 Fayi pâ ithre préchâ, ma kemin ke ché,
 po la rintrâye, che in kontre l'éthrébyo,
 chtou j'apyê éthindan le pâ, lè tsêroton
 iran di kou min préchâ, le kâfé dou
 Terâdzò, lè j'Ormo a la Toua, la Kri-
 Biantse a Epagny è pu chuto la Piantseta
 dè Chouhivouè avoui cha tan bala gruva chu
 la fathe è ouna chomeyére tan d'amâ, chè
 cheri pâ fê dè pachâ to drê, à ! lè tchintè
 nothyè li fajan lé, tchin dzouyo, lè fiyè
 pâ pouràjè, le vin bon, la gota achebin
 ma adon hou pourè bithè fro ou frê, l'avan
 di kou trè dè dè dzêvro chu lè rin, chovin
 lè dzandârmo dè Broc lou fayi vinyi
 betâ bou n'ouârdre.

Ou n'ôtra dè chè vatsè, la mèyâ, poya yô
 trintchivan li fajê po chon fre, l'avi
 drê kemin tsakon a betâ duvè tchivrè ou
 tsévrè po chè motètè, bin chur que dèvi
 payi cha pithe è chonyi chon kartèron dè
 pre dè têra a chi bravo tsévrè, ou fon
 dou dzordi din on galé tiyo i vèvè colà
 kotchè j'èchin dè j'â li bayivan lou mê.
 Chin avê grô trin, to chin li léchivè on

chorèpio dè chon trètèmin k'irè adon
dè pâ bin vouéro.

Din chi tin, mimamin le gârde tinyê di
bithè, ma li fayê rujâ kan fenâvè,
pèchke hou djâbyo dè brakonyé chè chevan
vuto fê on pyéji kan le vêyan fénâ ou bâ,
kan fénâvè pè lè tsô, in fajin cha mayà
irè mi éji po vèyi chè tsamo, pèchke che
to le mondo l'avê di bithè adon, tsakon
l'avê pâ prou têra ou bâ, è on kou fin dè
juiyè, ch'inbriyâvan vê lè tsô, " fin dè
tsô, fin dè mô, " le rèvi lè konyu è
vérifiâ, chèyi dri hô è dri bâ, rathalâ
in dzubyin chu lè dzènà, fére di piatè, lè
trinâ ou fèni ou bin vê le chitso de la
maya, du inke chonyi lè fortchè to doulon
dévan lè pi dè chi k'arandzè in verin
outoua dou mé ; l'outon, vinyi amon fére
lè fé è lè j'amenâ din on tsalè è pu pye
tâ a la nê, lè rapertchi bâ ou velâdzo
chu di yudzè a potson ratinyêtè pa di
cholido chariâ, ma adon, tchin fin, prin
kemin de la chêya, parfumâ kemin dou té,
m'in rapalo enko, ke to le velâdzo chintê
bon a la vèprâ dè hou dzoua k'iran jou
myâ ; ma le pye dû irè adi dè chéyi, lè
pi étvoudâ din di botè a fê po chéyi in

byié, to lârdzo dè hou golè in fouryin
 lè pèrè, è rémontâ in déjandanyin dou
 talon de la fô, du né nêre le matin,
 tantyè ke fachè tru tsô, adon a l'ombro
 don pyâno, apri di vayin dji-j'àre, fayi
 réadjuchtâ lè duvè fô. Ke l'avan bin
 choufê chu ou inthyeno dè fortèna, lè adon
 ke la bouna pèra d'intsapyo de la méjon
 cheri bin jàvoua.

Kan lè méjon éthan dè bou, trâ, lan è
 taviyon, ne li avê tchè le forni in dedin
 k'irè dè pèra, avoui chon pindin fro ;
 la pèra d'intsapyo, grâthe a li, on poui
 chèyi chin tru dè mô, l'êrba è le fin è
 rékouâ kan irè pâ lè ranmè dè pre dè
 têra ; vouê chta pèra amenavè le medji
 i bithè kemin i dzin.

Eh pu li moujo, kan enfin ou bè dè chè
 pènè, din lè j'ourè è l'ivouâdzò monchtro
 k'alâvè markâ chon rétoua din lè dzin,
 la ya è la grâthe, ke le Bon Dju la de ou
 pouro Job ; yo irè-he, kan pojâvo la pèra
 dè kâro dè chti mondo è di pyanètè ?
 Dévejâvè-he de la pèra d'intsapyo ?

hiyêr dè Că